



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Reginonis Abbatis Prumiensis Libri Duo De Ecclesiasticis Disciplinis & religione Christiana

Regino <Prumiensis>

Parisiis, 1671

III. Admonitio synodalis nova, quæ post evangelium legebatur ab Episcopo  
sedente in faldistorio.

**urn:nbn:de:hbz:466:1-14622**

## III.

Admonitio synodalis nova, quæ post evangelium legebatur ab Episcopo sedente in faldistorio.

*Ex Pontificali Romano Augustini Patricij de Picolominibus Episcopi Pientini.*

**F**RATRES carissimi, consacerdotes & cooperatores nostri. Noverit fraternitas vestra nos, licet indignos, locum tenere Aaron, vos autem Eleazari & Ithamari, nos fungi vice XII. Apostolorum, vos autem LXXII. discipulorum, nos pastores vestros esse, vos autem animarum vobis commissarum, nos de vobis, vos autem de plebibus vobis commendatis Domino nostro Jesu Christo rationem esse reddituros. Igitur ut in die tremendi judicij inter bonos dispensatores inveniamur, admonemus & obsecramus fraternitatem vestram ut vita & conversatio vestra sit irreprehensibilis. In domibus vestris mulieres non cohabitent. Omni nocte ad nocturnas horas surgite. Officium vestrum horis certis decantate. Missam jejuni tantum, & non in vestibus communibus, sed sacris, amictu, alba, cingulo, manipulo, stola, & casula, vestimentis nitidis, quæ ad alios usus non serviant, parati, devotè & religiosè celebrate, & in ea corpus & sanguinem Domini nostri Jesu Christi cum omni reverentia & tremore sumite. Corporalia & pallæ ex lino fieri debent, & sint mundissima; quæ & alia linthea ac vasa sacra propriis manibus abluite & extergite diligenter. Altare sit coopertum mundis lintheis saltem tribus diversis; ad quod nulla mulier accedat. Et desuper nihil ponatur nisi reliquiæ ac res sacræ & pro sacrificio opportunæ. Missalia, gradualia, lectionaria, & antiphonaria vestra sint completa & perfectæ. Ecclesiæ vestræ bene sint coopertæ & mundæ. In sacristiis sive secretariis aut juxta altare majus sit locus aptus ad in-

fundendum aquam ablutionis corporalium & lintheorum, vasorum, & aliarum rerum sacrarum, ac manuum, postquam sanctum chrisma aut oleum catechuminum vel infirmorum tractaveritis. Ibi que pendeat vas cum aqua munda pro lavandis manibus sacerdotum & aliorum qui rem sanctam & officium divinum sunt peracturi, & propè lintheum mundum ad illas abstergendum. Atria Ecclesiæ sint bene munita. Nullus sine scitu & consensu nostro per potestatem secularem Ecclesiam obtineat. Nullus Ecclesiam ad quam intitulus est dimittat, & ad aliam quæstus gratia se transferat. Nullus plures Ecclesias, sine titulo & contra sacrorum canonum dispositiones nancisci præsumat. Nullatenus etiam una Ecclesia inter plures dividatur. Nullus extra Ecclesiam in locis non consecratis, aut calcaribus indutus, vel cultellis extra pendentibus, celebret. Nullus alterius parrochianum, nisi itinerantem, & tunc de rectoris sui licentia, ad communionem recipiat. Nullus in alterius parrochia absque proprii sacerdotis licentia Missam celebret. In celebratione quisque calicem & oblata, non circulo, aut digitorum vacillatione, ut quidam faciunt, sed junctis & extensis digitis, cruce signet, sicque benedicat. Calix & patena sint aurei vel argentei, non ærei aut auricalchei, vitrii vel lignei. Quisque Presbyter Clericum habeat vel scolarem qui cum eo psalmos cantet, epistolam, lectionem legat, & in Missa respondeat. Ipse quoque Presbyter infirmos visite & reconciliet, & juxta Apostolum propria manu communicet, & oleo sancto inungat. Nullus præsumat tradere communionem laico aut femine ad ferendum infirmo. Nullus pro baptizandis infantibus, sive adultis aut infirmis reconciliandis, aut mortuis sepeliendis, præmium vel munus exigat. Per negligentiam vestram nullus infans sine baptismo & adultus sine communiōne pereat. Nullus vestrum sit ebriosus aut litigiosus. Nullus arma ferat. Nullus canum aut avium joci inserviat, seu intabernis bibat. Quisque vestrum quantum sapit de evangelio, dominico & ceteris festis diebus suæ plebi annunciet. Verbum Domini prædicat. Curam pauperum peregrinorum, viduarum, & orphanorum habete, ipsosque peregrinos ad prandium vestrum

vestrum vocare. Estote hospitales, aliis exinde bonum exemplum perhibentes. Singulis diebus dominicis ante Missam aquam qua populus aspergatur benedicite. ad quod vas proprium habetote. Vasa sacra & vestimenta sacerdotalia nolite negotiatori aut tabernario in pignus dare. Minus dignè pœnitentem cujuscunque rei gratia ad reconciliationem non adducite, nec ei reconciliationis testimonium perhibete. Usuras non exigite. Nec facultates vestras post ordinationem vestram acquisitas alienate, quoniam Ecclesiæ sunt. Nullus etiam res, possessiones, aut mancipium Ecclesiæ vendere, commutare, aut quocunque ingenio præsumat alienare. Nullus decimam alterius recipiat. Nullus pœnitentem carnem manducare aut vinum bibere invitet nisi pro eo tunc elemosynam fecerit. Quisque fontes baptismales lapideos habeat bene mundos: quos si habere non poterit, vas aliud ad hoc opus solum deputatum teneat. Omnibus parrochianis vestris symbolum & orationem dominicam & jejunia quattuor temporum & alia Ecclesiæ mandata significare observanda. Ante quadragesimam quarta feria populum ad confessionem admonete, & confessis juxta qualitatem criminis pœnitentiam injungite. Tribus temporibus in anno, id est, Natalis Domini, Paschæ, & Pentecostes, omnes fideles accedere ad communionem corporis Domini nostri Jesu Christi invitate, & ne desit quin saltem in Pascha communicent. Certis temporibus conjugatos ab uxoribus abstinere exhortemini. Nullus vestrum rubeis aut viridibus vestibus utatur. Diem dominicam & ceteras festivitates absque opere servili à vespera ad vesperam celebrari docete. Cantus & choreas mulierum in atrio Ecclesiæ fieri prohibete. Incantationes super mortuos nocturnis temporibus à vulgo fieri consuetas sub obtestatione Dei omnipotentis vetate. Cum excommunicatis nolite communicare; nec quis vestrum eis vel in eorum præsentia celebrare præsumat. Quod etiam plebi nunciate, & quòd nullus ex plebe uxorem domum ducat nisi priùs nuptiæ temporibus ab Ecclesia permissis publicè fuerint celebratæ. Quòd nullus ad raptam vel consanguineam accedat, aut alterius sponsam ducat, omnibus prohibete. Porcarios & alios pastores saltem Dominica faciatis voca-

Qg

ri ad Missam. Paternos ut filios suos symbolum & orationem dominicam doceant aut doceri faciant exhortamini. Sacramentum eucharistiæ, sanctum chrisma, & oleum cathecuminum, ac sanctum seu infirmorum in Ecclesia in loco mundo condecanti & securo sub sera & fida custodia diligenter servate. Quisque vestrum expositionem simboli & orationis dominicæ juxta orthodoxorum patrum traditiones penes se habeat, easque, ac orationes Missarum, & epistolas, evangelia, & canonem bene intelligat, ex quibus prædicando populum sibi commissum sedulo instruat & maximè non bene credentem. Introitum Missæ, orationes, epistolam, graduale, evangelium, symbolum, & cetera non secreta, alta & intelligibili voce proferat. Secreta verò & canonem morosè & distinctè submissa voce legat. Psalmorum verba & distinctiones regulariter cum canticis consuetis intelligibiliter pronunciet. Symbolum Athanasij de Trinitate & fide catholica memoriter teneat. Exorcismos & orationes ad cathecuminos faciendas ac reliquas preces super masculum & feminam pluraliter vel singulariter respectivè distinctè proferat. Ordinem baptizandi & ad succurrendum infirmis, reconciliationis, & commendationis animæ, & in agendis exequiis defunctorum, juxta modum canonicum observet. Exorcismos & benedictiones salis & aquæ pertinenter legat. Cantum diurnum & nocturnum sciat. Computum etiam minorum ad inveniendum litteram dominicalem, tempus intervalli diei Paschæ & majorum mobilium, festorum non ignoret. Ut per hæc & alia bona opera unà cum populo vobis credito perpetua beatitudine perfruamini, præstante Domino nostro Jesu Christo, cui est honor & gloria in secula seculorum.

